

Аллоҳнинг шариатидан бошқа шариатга юришнинг оқибати



19:00 / 27.05.2025 932

كَفَرِيْنَ بِهَا اَصْبَحُوا ثُمَّ قَبْلَكُمْ مِّنْ قَوْمٍ سَاَلَهَا قَدْ



«Сиздан олдин ҳам бир қавм уларни сўраган, сўнгра эса уларга кофир бўлиб қолган эди» (Моида сураси, 102-оят).

Бунга энг ёрқин мисол Бану Исроилдир. «Бақара» сураси тафсирида уларнинг қурбонликка амр этилган сигирнинг сифатлари ҳақида бирин-кетин ноўрин саволлар бериб, ўзларига ўзлари қийин қилиб олганлари,

кейин кофир бўлганликлари ҳақида батафсил сўз юритилган эди. Бунга ўхшаш ҳоллар яна келади.

Имом Бухорий ривоят қилган ҳадисда Набий соллаллоҳу алайҳи васаллам:

«Сизларга айтмай, тек қўйсам, мени ҳам тек қўйинглар. Шубҳасиз, сизлардан олдингиларни ҳалок қилган нарса – саволларнинг кўплиги ва пайғамбарларига хилофлари бўлган», – деганлар.

Бундан аввалги «Эй иймон келтирганлар! Ҳар хил нарсаларни сўрайверманглар» оятининг нозил бўлишига сабаблардан бири одамларнинг Набий соллаллоҳу алайҳи васалламга баҳийра, соиба, васийла ва ҳоммлар ҳақида берган саволлари эди. Бу нарсалар ҳақида кейинги оятда маълумот берилади:

وَلَكِنْ حَامٍ وَلَا وَصِيَّةٍ وَلَا سَائِبَةٍ وَلَا بَحِيرَةٍ مِنْهُ اللَّهُ جَعَلَ مَا

يَعْقِلُونَ لَا وَأَكْثَرُهُمُ الْكَذِبَ اللَّهُ عَلَى يَفْتَرُونَ كَفَرُوا الَّذِينَ ١٠٣

«Аллоҳ на баҳийра, на соиба, на васийла ва на ҳоммни қилгани йўқ. Лекин куфр келтирганлар Аллоҳга нисбатан ёлғон тўқирлар. Уларнинг кўплари ақл юритмаслар» (Моида сураси, 103-оят).

Ояти кариманинг тўлиқ маъносини ўрганишдан олдин ундаги баъзи сўзларнинг маъноларини тушуниб олишимиз зарур.

Агар бешинчи бўталоқ урғочи туғилса, она туянинг қулоғини тилиб, белгили қилиб, қўйиб юборилар ва у «баҳийра» деб айтилар эди. Арабларнинг бузуқ эътиқодларига кўра, бундай туянинг гўштини ейиш, сутини ичиш, ўзини миниш ёки устига юк юклаш ҳаром ҳисобланарди. «Баҳийра» деб қўйиб юборилган туя эркин ҳолда юраверар, унга ҳеч ким тегмас эди.

«Соиба» луғатда «қўйиб юборилган» деган маънони англатиб, жоҳилият одати бўйича, бир киши сафардан келгани, касалдан тузалгани ёки шунга ўхшаш бошқа муносабатлар ила назр қилган туяга айтиларди. Бундай туя ҳам қўйиб юборилар ва у ҳам худди «баҳийра» каби гўшти ейилмайдиган, сути ичилмайдиган, ўзи минилмайдиган ва юк ортилмайдиган муқаддассифат ҳайвонга айланиб қолар эди.

«Васийла» луғатда «уловчи» деган маънони англатиб, араблар урфида бирин-кетин улаб, урғочи бола туққан қўйга айтиларди. Уни ҳам сўймас эдилар.

«Ҳомм» эса луғатда «ҳимоя қилувчи» деган маънони англатиб, урғочи ҳайвонларга қочириш учун қўйиладиган эркак ҳайвон шундай аталар эди. Араблар бир эркак ҳайвон ўнта урғочини қочирса, уни «ҳомм» деб атар эдилар ва унга ҳам алоҳида муносабат кўрсатилар, минилмас, юк юкланмас ва бошқа имтиёзлар берилар эди.

Ушбу тўрт истилоҳ ҳақида бошқа ривоятлар ҳам бор. Аммо ҳаммаси ҳам мантиқсиз, жаҳолат аломати бўлган ишлардир. Эҳтимол, қабила ва жойларнинг ўзгариши билан бу тўрт истилоҳ ҳам турлича маънода ишлатилгандир. Қандай бўлишидан қатъи назар, бу тасаввур ва тасарруфлар Аллоҳнинг шариатига амал қилмаган инсонлар, илоҳий кўрсатмаларни ўзларига дастур қилиб олмаган жамиятлар қандай ҳолга тушиб қолишини яққол кўрсатиб турибди. Аллоҳнинг айтганини бир четга қўйганлар, табиатан мавжуд асл ҳис-туйғуларни барибир йўқ қила олмайдилар. Аста-секин ўзлари ушбуга ўхшаш мантиқсиз нарсаларни тўқиб чиқиб, муқаддаслаштиришга ҳаракат қиладилар. Аллоҳ бу ишларни инкор этиб:

«Аллоҳ на баҳийра, на соиба, на васийла ва на ҳоммни қилгани йўқ. Лекин куфр келтирганлар Аллоҳга нисбатан ёлғон тўқирлар», – дейди.

Араблари Аллоҳни инкор этмас эдилар, балки Аллоҳга ширк келтирардилар. Бут-санамлар – кичик Худолар, ўртада воситачи бўлиб, бизни катта Худога етказди, деган эътиқодда эдилар. Шунга қарамай, Аллоҳ бу оятда уларни кофирлар деб атамоқда, бу даъволари Аллоҳга нисбатан ёлғон эканини таъкидламоқда. Кофирликлари Аллоҳнинг шариатига амал қилмасликларидан бўлса, Аллоҳга нисбатан ёлғон тўқишлари – баҳийра, соиба, васийла ва ҳоммларни илоҳча деб аташлари эди. Бундай ишларни Аллоҳ амр қилгани йўқ, улар ўзлари тўқиб чиқариб,

сўнгра Аллоҳга нисбат беришмоқда. Аллоҳнинг шариатидан бошқа шариатга юришнинг оқибати шунақа бўлади.

Оятнинг охирида:

«Уларнинг кўплари ақл юритмаслар», – дейилмоқда.

Тўғри, ақли бўлса, Аллоҳнинг шариатидан бошқа шариатга юрармиди?!
Ўзича турли нарсаларни тўқиб чиқарармиди?!

«Тафсири Ҳилол» китоби асосида тайёрланди

Ушбу китоб Ўзбекистон Республикаси Дин ишлари бўйича қўмитанинг 2024 йил 22 октябрдаги 02-07/6395-рақамли хулосаси асосида тайёрланди.